



## The Holy See

---

IOANNES PAULUS PP. II LITTERAE APOSTOLICAE **MORES HOMINIS** DEI SERVAE MARCELLINAE DAROWSKA  
CAELESTIUM CONCEDUNTUR HONORES BEATORUM Ad perpetuam rei memoriam. – «Mores hominis educatione  
formantur... Ratio educandi puellas in Congregatione nostra adhibita hoc sibi proponit ut alumnae ita instituantur ut Regni  
Dei cives se esse sciant, ut scilicet feminae non modo artibus ingenuis eruditae et humanitate perpolitae fiant, sed ut  
praesertim moribus honestis probisque perficiantur, ut coniuges were christianaes matresque familiae fieri possint  
domibusque suis praeesse et patriae adesse addiscant». Haec verba ex testamento Venerabilis Servae Dei Mariae  
Marcellinae Darowska hausta iure quidem summa seu compendium eius charismatis apostolici putantur; quapropter a  
Congregatione Filiarum Beatissimae Mariae Virginis Immaculatae fideliter etiamnunc adimplentur et observantur. Serva  
haec Dei, Ioannis Kotovicz ac Maximiliana Jastrzębska filia, de Polona est gente nata, familia admodum nobili pluribus  
liberis aucta, die XVI mensis ianuarii anno MDCCCXXVII in villa Szulaki intra provinciam olim Rei Publicae Poloniae  
orientalem sita. Puella praestantis ingenii mentisque acutae; bene deinceps erudita, ab ipsa infantia dono est  
contemplationis cumulata, verum ad munus sese praecipuum ac singulare in sua Ecclesia exsequendum destinatam a  
Deo esse nesciebat, quod postmodum communia officia uxoris ac matrix experta indictum sibi cognovit. Illa enim dilecta  
parentum suorum illa germanorumque simul carissima soror, cum suo adolevit tempore, a patre in matrimonium locata  
Carolo Darowski est, qui vicissim obiit anno MDCCCXLIX, et brevi felix duorum liberorum mater facta, marito in bonis  
administrandis opem tulit optimaque rusticorum patrona exstitit. Tribus modo annis elapsis coniuge inopinata extincto  
vidua est facta filiumque parvulum anno postero amisit, ad cuius tumulum Maria Marcellina se totam Deo devotit. Tum  
Dominus ei, quae filiolam unicam superstitem educare debebat, opus pium a Iosepha Karska et Hieronymo Kajsiewicz  
Congregationis Domini Nostri Iesu Christi Sacerdote Romae incohatum commisit adimplendum et deinceps curandum.  
Quandoquidem hoc contigit anno MDCCCLIV, quo est Immaculatae Conceptions dogma promulgatum, ita Congregatio  
Filiarum Beatae Mariae Virginis Immaculatae excitata est, cuius munus praecipuum esset puellas christianas ea ratione  
instituere et educare ut familiae sanctiores fierent animoque christiano imbuerentur. Mortua vero anno MDCCCLX  
Iosepha Karska, haec Dei Serva nascentis Congregationis gubernationem suscepit atque, laudatorio decreto impetrato,  
moniales de Urbe in oppidum Jazłowiec archidioecesis Leopolitanae traduxit. Quinquaginta exinde annos Congregationi  
praefuit; sex maiores eius domos in variis patriae condiclit partibus, ubi alumnae instituebantur pauperioresque  
nutriebantur et vestiebantur. Cum sororibus atque alumnis coniuncte vixit earum unamquamque veluti mater optima  
diligenter fovit, disceptationes asceticas conscripsit, pias similiter meditationes atque hortationes ad sorores. Signa  
temporis sui observans commutationes patriae sociales perspexit et egestati plebis subvenire studuit, omnes ordines  
populi per suam educandi curam et disciplinam amplectens. Rerum postmodum opumque exiguitate ipsa vexata a  
civilibusque saepius impedita potestatibus, fortiter superavit quaslibet vitae asperitates. Mysticō sensu imbuta et inter  
suos sanctimoniae aestimatione circumdata, tenebras tamen interiores passa est, cum maxime operibus suis apostolicis  
perficiendis administrandisque navaret operam. Quoniam Beatissimae virginis Marine sanctuarium Czestochoviense

colebat, ut in Claro Monte patratum scelus sacrilegum quodammodo repararet, vitae suae reliquum etiam impendit, donec ea in coenobio Jazlovicensi die V mensis Ianuarii vita decessit anno MCMXI. Nos itaque anno MCMXCVI die XV mensis Decembris palam Mariam Marcellinam declaravimus heroum in modum virtutes excoluisse omnes christianas. Paulo autem post, die XXV mensis Iunii anno MCMXCVI protulimus decretum super miraculo quod eiusdem Servae Dei intercession adscribebatur statuimusque simul ut Romae beatificationis ritus die VI octobris eiusdem anni perageretur. Hodie igitur apud beatissimi Petri templum adstante ingenti omnibus e terris christifidelium turma, sollemnia intra eucharistica, summa animi pastoralis Nostri cum alacritate ac religiosae pietatis affectione, hanc pronuntiavimus formulam qua una cum aliis in Beatarum caelitum fastos Mariam Marcellinam Darowska etiam inscripsimus: «Nos, vota fratrum nostrorum Ioannis Nowak, Episcopi Siedlecensis, Desmondi Connell, Archiepiscopi Dublinensis, Antonii Mariae Rouco Varela, Archiepiscopi Matritensis, et Mariani Jaworski, Archiepiscopi Leopolitani Latinorum, necnon plurimorum aliorum Fratrum in episcopatu multorumque christifidelium explentes, de Congregationis de Causis Sanctorum consulto, Auctoritate Nostra Apostolica facultatem facimus ut Venerabiles Servi Dei Vincentius Lewoniuk et duodecim Socii, Edmundus Ignatius Rice, Maria Anna Mogas Fontcuberta et Marcellina Darowska Beatorum nomine in posterum appellantur eorumque festum: Vincentii Lewoniuk et duodecim Sociorum die vicesima tertia Ianuarii; Edmundi Ignatii Rice die quinta Maii; Mariae Annae Mogas Fontcuberta die sexta Octobris; et Marcellinae Darowska die quinta Ianuarii in locis et modis iure statutis quotannis celebrari possit. In nomine Patris et Filii et Spiritus Sancti». Preces dein universa cum Dei Ecclesia fundentes beatam Mariam Marcellinam Darowska pie invocavimus, quatenus, vita iam in exemplum imitationemque omnibus fidelibus proposita, sua apud Redemptorem Divinum deprecatione in terris adhuc versantes militantesque quam efficacissime confirmaret. Singula quae hisce litteris ac decrevimus, volumus et nunc et in posterum valere tempus, contrariis quibusvis rebus nequaquam obstantibus. *Datum Romae, apud Sanctum Petrum, sub anulo Piscatoris, die VI mensis Octobris anno MCMXCVI, Pontificatus Nostri duodecimmo. ANGELUS card. SODANO Secretarius Status © Copyright 1996 - Libreria Editrice Vaticana*